



Broj/Број: 01/2a-50-1-2-7/07
Sarajevo/Сарајево, 28.05.2007.

ZAPISNIK

7. sjednice Komisije za vanjske poslove Zastupničkog doma Parlamentarne skupštine Bosne i Hercegovine, održane 21.05.2007. godine

Sjednica je počela u 13 sati i vodio ju je predsjednik Komisije Slavko Matić.

Sjednici su prisustvovali sljedeći članovi Komisije: Slavko Matić, Azra Hadžiahmetović, Milica Marković, Denis Bećirović, Sadik Ahmetović, Husein Nanić, Sefer Halilović, te Merdžana Iglica – sekretar Komisije.

Odsutni su bili Milorad Živković i Azra Alajbegović.

Sjednici su prisustvovali i svi pozvani gosti i predstavnici predlagača: Radomir Bogdanović ispred Ministarstva vanjskih poslova BiH, Lejla Somunović ispred Ministarstva sigurnosti BiH, Brane Janković iz Sektora za međunarodnu suradnju Ministarstva odbrane BiH, Snježana Ivković ispred Ministarstva komunikacija i prometa BiH i Niko Grubešić, pomoćnik ministar u Ministarstvu pravde BiH.

Zapisnik je vodila Merdžana Iglica, sekretar Komisije.

Predsjednik Komisije je predložio sljedeći

DNEVNI RED

- 1) Verificiranje Zapisnika 5. i 6. sjednice Komisije za vanjske poslove Zastupničkog doma Parlamentarne skupštine Bosne i Hercegovine;
- 2) Davanje suglasnosti za ratificiranje Sporazuma između Bosne i Hercegovine i Sjevernoatlantske ugovorne organizacije (NATO-a) o sigurnosti informacija (Predlagatelj: Ministarstvo sigurnosti BiH);
- 3) Davanje suglasnosti za ratificiranje Sporazuma između Vijeća ministara Bosne i Hercegovine i Vijeća ministara Srbije i Crne gore o vraćanju i prihvatu lica koja ne ispunjavaju, ili više ne ispunjavaju uvjete za ulazak ili boravak na teritoriji druge države (Predlagatelj: Ministarstvo sigurnosti BiH);
- 4) Davanje suglasnosti za ratificiranje Sporazuma o vojnom grantu između Vijeća ministara Bosne i Hercegovine i Vlade Republike Turske i Implementacioni protokol koji se odnosi na finansijsku pomoć između Ministarstva odbrane Bosne i Hercegovine i Generalštaba Republike Turske (Predlagatelj: Ministarstvo odbrane BiH);
- 5) Davanje suglasnosti za ratificiranje Sporazuma između Vijeća ministara Bosne i Hercegovine i Vlade Republike Slovenije o suradnji na polju odbrane (Predlagatelj: Ministarstvo odbrane BiH);
- 6) Davanje suglasnosti za ratificiranje Sporazuma o uspostavljanju željezničke mreže velikih mogućnosti u jugoistočnoj Evropi (Predlagatelj: Ministarstvo komunikacija i prometa BiH);
- 7) Davanje suglasnosti za ratificiranje Osnovnog ugovora između Bosne i Hercegovine i Svete Stoline i Dodatni protokol na Osnovni ugovor (Predlagatelj: Ministarstvo pravde BiH);

- 8) Informacija Zajedničke komisije za odbranu i sigurnost BiH sa održanog sastanka sa izvjestiocima Političkog komiteta Parlamentarne skupštine Zapadnoevropske unije;
- 9) Informacija Zajedničke komisije za odbranu i sigurnost BiH sa održanog sastanka sa g. Bruce-om McLane-om, političkim savjetnikom Komande NATO Štaba u BiH;
- 10) Promemorija o načelima ponude Republike Hrvatske Bosni i Hercegovini za dodjelu statusa najpovlaštenije nacije u Luci Ploče (Materijal: Ambasada Republike Hrvatske u BiH-za informaciju);
- 11) Informacija sa sjednice Vijeća sigurnosti UN-a o statusu Kosova i Izvještaj o „Stanju priprema budućeg civilnog prisustva EU i međunarodne zajednice na Kosovu“ (Materijal: MVP BiH);
- 12) Informacija o konsultacijama zemalja članica o ustavnom okviru EU (Materijal: MVP BiH);
- 13) Informacija o mogućnosti za organiziranje jednodnevne radne posjete Komisije za vanjske poslove Kraljevini Španiji (Materijal: MVP BiH);
- 14) Zabilješka iz razgovora Svena Alkalaja, ministra vanjskih poslova BiH sa predsjednikom Republike Srbije Borisom Tadićem- za informaciju;
- 15) Informacija o prijedlogu za uspostavljanje suradnje Narodne skupštine Republike Srpske sa Parlamentom Republike Mađarske (Materijal: MVP BiH);
- 16) Razmatranje pravilnika o međunarodnim aktivnostima iz srpnja/jula 2006.godine (Materijal Komisije za financijske i administrativne poslove Zastupničkog doma);
- 17) Razmatranje Odluke o uspostavljanju i djelokrugu rada međuparlamentarnih grupa prijateljstva Parlamentarne skupštine BiH za bilateralnu suradnju s parlamentarnim tijelima drugih zemalja (Materijal Sekretarijata i Sektora za međunarodne odnose PSBiH);
- 18) Tekuća pitanja.

Nakon objašnjenja g. Matića da su, zbog nemogućnosti prisustvovanja sjednici ministra vanjskih poslova Svena Alkalaja, neke od prije predviđenih tačaka dnevnog reda ostavljene za raspravu na nekoj od sljedećih sjednica Komisije, prijedlog dnevnog reda usvojen je jednoglasno.

Ad.-1. Verificiranje Zapisnika 5. i 6. sjednice Komisije za vanjske poslove

Nije bilo rasprave i primjedbi i zapisnici su jednoglasno usvojeni.

Ad.-2. Ad.-3.

Nakon što je predstavnik Ministarstva vanjskih poslova BiH, Radomir Bogdanović dao uvodno objašnjenje koje se odnosilo na sve gore navedene sporazume, da su pribavljene sve neophodne suglasnosti za davanje na ratifikaciju navedenih sporazuma, te da je svaki ugovor prošao ukupnu proceduru predviđenu Zakonom o zaključivanju međunarodnih sporazuma i ugovora, predstavnica Ministarstva sigurnosti BiH, Lejla Somunović ukratko je upoznala članove komisije o sadržaju Sporazuma između Bosne i Hercegovine i Sjevernoatlantske ugovorne organizacije (NATO-a) o sigurnosti informacija, kao i Sporazuma između Vijeća ministara Bosne i Hercegovine i Vijeća ministara Srbije i Crne gore o vraćanju i prihvatu lica koja ne ispunjavaju, ili više ne ispunjavaju uvjete za ulazak ili boravak na teritoriji druge države. Posljednji sporazum je potpisan još 2004. godine, dok je postojala državna zajednica SCG, a sada je u proceduri identičan tekst sporazuma i sa RCG, jer je Srbija nasljednica svih međunarodnih sporazuma koji su prethodno potpisani.

Kako nije bilo dodatnih pitanja i komentara, jednoglasno je data suglasnost za ratificiranje ova dva sporazuma.

Ad.-4. Ad.-5.

O Sporazumu o vojnom grantu između Vijeća ministara Bosne i Hercegovine i Vlade Republike Turske i Implementacionom protokolu koji se odnosi na finansijsku pomoć između Ministarstva odbrane Bosne i Hercegovine i Generalštaba Republike Turske, te o Sporazumu između Vijeća ministara Bosne i Hercegovine i Vlade Republike Slovenije o suradnji na polju odbrane, uvodnu riječ dao je Brane Janković iz Sektora za međunarodnu suradnju Ministarstva odbrane BiH, naglasivši da su sve procedure ispoštovane, te da su ovo tipski ugovori koji se odnose na finansijsku pomoć i sve druge vidove suradnje na polju odbrane koje BiH potpisuje sa drugim zemljama.

I na ova dva sporazuma je bez rasprave i pitanja data jednoglasno suglasnost za ratificiranje.

Ad.-6.

O Sporazumu o uspostavljanju željezničke mreže velikih mogućnosti u jugoistočnoj Evropi uvodna objašnjenja je dala predstavica Ministarstva komunikacija i prometa BiH, Snježana Ivković, šef pregovaračkog tima za izradu ovog sporazuma. Ona je precizirala da se radi o projektu koji je veoma važan za BiH, ne samo sa aspekta poboljšanja putne infrastrukture, već i voznog parka naše zemlje. Ova željeznička mreža velikih mogućnosti podrazumijeva 16 željezničkih krakova na kojima se očekuje postizanje brzine od 160 km/h do 2020 godine, a komercijalna brzina na ovoj mreži biće najmanje 130 km/h.

Pružajući punu podršku poboljšanju kvaliteta željezničkih usluga u budućnosti, članovi Komisije su jednoglasno dali suglasnost za ratificiranje ovog sporazuma.

Ad.-7.

O Osnovnom ugovoru između Bosne i Hercegovine i Svete Stolica i Dodatnom protokolu na Osnovni ugovor, uvodnu riječ dao je Niko Grubešić, pomoćnik ministra pravde, navodeći da se ovim ugovorom reguliraju pitanja pravnog okvira odnosa između BiH i Katoličke crkve. Istakao je i da je ugovor prošao svu potrebnu proceduru dobijanja suglasnosti za njegovo potpisivanje. Na pitanje Milice Marković da li je sličan sporazum pripremljen i sa Pravoslavnom crkvom u BiH, g. Grubešić je potvrdio da je prijedlog od strane Ministarstva pravde BiH bio da se pitanja pravnog okvira sa svim vjerskim zajednicama u BiH riješe na ovakav način. Denis Bećirović je upitao na bazi čega je bivša SFRJ imala ovakve vrste ugovora sa vjerskim zajednicama, a odgovoreno mu je da je SFRJ imala potpisane protokole sa svim vjerskim zajednicama.

Nakon ovoga, suglasnost za ratificiranje ovog ugovora data je jednoglasno.

Ad.-8. Ad.-14.

Sve navedene informacije, uključujući i Promemoriju o načelima ponude Republike Hrvatske Bosni i Hercegovini za dodjelu statusa najpovlaštenije nacije u Luci Ploče, o kojoj je Azra Hadžiahmetović dala pojašnjenja o značenju termina tzv. „statusa najpovlaštenije nacije“, primljene s k znanju od strane članova Komisije bez rasprave i dodatnih komentara. Gđa Hadžiahmetović je povodom ovoga dala prijedlog da se ovakve vrste informacija ne stavljaju a priori na dnevni red sjednica Komisije, već kada se ukaže potreba za raspravu o pojedinoj temi i ova sugestija je prihvaćena od strane Komisije.

Ad.-15.

Raspravljajući o pismu predsjednika NS RS, Igora Radojičića za uspostavljanje suradnje Narodne skupštine Republike Srpske sa Parlamentom Republike Mađarske, koje je Parlamentarnoj skupštini BiH i Komisiji za vanjske poslove Zastupničkog doma proslijeđeno iz Ministarstva vanjskih poslova BiH, Azra Hadžiahmetović je izrazila neslaganje sa sadržajem dopisa iz ovog ministarstva, nazivajući ga „gotovo incidentnim“ i tražeći da se Komisija o njemu, kao i o samom pismu ne izjašnjava sve dok ne dobije zvaničan stav Ministarstva vanjskih poslova BiH o ovom pitanju. Članovi Komisije su se sa ovim složili i donijeli zaključak da se neće određivati o sadržaju pisma dok ne dobiju relevantan stav nadležnog ministarstva o njemu.

Ad.-16. Ad.-17.

O ovim tačkama dnevnog reda je uvodna objašnjenja dala sekretar Komisije, Merdžana Iglica, kao i o razlozima stavljanja na dnevni red Odluke o uspostavljanju i djelokrugu rada međuparlamentarnih grupa prijateljstva Parlamentarne skupštine BiH za bilateralnu suradnju s parlamentarnim tijelima drugih zemalja (razlog je, naime, jer je i Zastupnički dom stavio ovu tačku dnevnog reda na svoju 9. sjednicu, održanu 23.05.2007.godine). Gđa Iglica je upoznala članove Komisije sa činjenicom da je svoje primjedbe i sugestije na ovaj Pravilnik i Odluku dala Komisija za vanjske poslove Zastupničkog doma PSBiH u prethodnom mandatu koje su i uvrštene u prečišćeni tekst ova dva dokumenta. Članovi Komisije su potom dali pozitivno mišljenje o principima i odredbama Odluke o uspostavljanju i djelokrugu rada međuparlamentarnih grupa prijateljstva Parlamentarne skupštine BiH za bilateralnu suradnju s parlamentarnim tijelima drugih zemalja i preporučili Zastupničkom domu da ovu Odluku usvoji.

Ad.-18.

Pod tekućim pitanjima je Sadik Ahmetović iznio zahtjev da Ministarstvo vanjskih poslova BiH Komisiji dostavi Protestnu notu Vuka Draškovića, bivšeg srbijanskog ministra vanjskih poslova upućenu Predsjedništvu BiH od 23.04.2007. godine. Azra Hadžiahmetović je takođe zatražila da Ministarstvo vanjskih poslova BiH pripremi pismenu informaciju oko djelokruga rada i aktivnosti novouspostavljenog Vijeća za regionalnu suradnju (RCC) u Sarajevu.

Sjednica je potom završila svoj rad u 14h20.

SEKRETAR
KOMISIJE ZA VANJSKE POSLOVE
Merdžana Iglica

PREDSJEDATELJ
KOMISIJE ZA VANJSKE POSLOVE
Slavko Matić

Kopija: MVP-u BiH